

## Nwàk JUD

*Jud nè yi à ye moma Jem à còm ñwàk nè'e yi. Bwiiñ dũkgè dè wo à ye bwema Jisos Krest, megu dè wo à ka yàwo ve'nè com (ye Màtiyò13:55). Yi à còm nà' ñgòtip bwiiñ dè yà'a jəñ ñkərə bùu bum sè bùu mok wèñ sə yə'rə fa bwiiñ yà'a. Wo à sə cwi bùsə nza' Nwi nè sə dũk dè aco ñwè gu bup mok ntèñ, bùusè Nwi a swi wes fa bwiiñ bup awo lañ. Jud sə dũk dè bùu yà'sə ka Nwi riñ lok nè kè' mò'fis fana Nwi nè kà wo mè'rə.*

<sup>1</sup> Còm ñwàk nè'e mùu Jud. Mù ñgà fàk Jisos Krest, nè ye moma Jem. Mù sə còm fa nà' bohòwèñ sè Tè' àvès Nwi a dzəm wèñ, nè swék wèñ fana Jisos Krest sə jəñ ñkərə bohòwèñ yà'a.

<sup>2</sup> Mù lèñ dè Nwi koksə manziñ bohòwèñ, nè gu dè wèñ cum bə fifi sè'. Mù sə lèñ sè' dè wèñ ye nè rɛɛñ dzədzəm ye nè. Mù lèñ dè wèñ tse' bum yè'sə nduk nè nduk.

### *Ngàa Yə'rə Fa Bwi Bum Mvwès*

<sup>3</sup> Nge' am wèñ, mù a sə dzəm wùriñ ñgòcòm fa wèñ bə nzak lùñ nè Nwi a fa vesùwèñ nè. Mù tsərə fe'lə mankwèñ dè mù com fa wèñ lɛ ñgòlù guguñ ñgònòñsə mali ntirè nè wèñ a dzəmtse' bə liñ Krest nè. Nwi a fa bùu ye wèñ nà' nè kè' mò'fis, nè anə kà mok kupsè yuk.

<sup>4</sup> Mù tsərə ve'nè bùusè bùu mok sè wo a bèn ñgòrì Nwi wèñ a wooñ ni mụñgorè wèñ anə. Wo sə làp ñgòcwi bùsə ncèp nè nà' sə tsè' bwiiñ bə

bòvèm nè Nwì tse' nà' bohòvès nè. Wo cwi ncèp nè ya wo tse' mandzè nè ñgògù nsàp bup nè wo dzəm ñgògù pwe'. Wo gù vɛ'nə, nè sə dzeen Jisòs Krɛst nè yi Masà nè ye Tà àvès yi yìyi nè. Wo à còm nònşə yà' ndzənə ñwàk Nwì laŋ də Nwìi nè kè yeŋşə nsàp bù ànə ñgə'.

<sup>5</sup> Wèŋ rì bə ncèp nè mù sə duk də mu cep fa weŋ nè'e pwe'fo' laŋ, fana mù dzəm ñgòcèp mali fa weŋ nà', ya wèŋ tsərə li nà' fo'. Ncèp nè də, ghà nè Tà ànə tɛsə bùu ye wèŋ fana wo tɛsə mvwe' nzeŋgòn Ijìp yà'a, à kè dzèŋ maŋkwèŋ yi à zə mali bùu mok mʉtsətşə'rə wo sè wo à ka duk ye yuk wèŋ.

<sup>6</sup> Mòok sè' də masinjàa Nwì sè wo à ka mvwe' sè Nwì à də wo cum fo' sə cum yà'a, wo à tasə wo bə kwan nè nà'a nè kà fiìŋ yuk. Wo à màk gèsə lòwo sə mvwe' sè ndzəm seŋ tə ŋkiŋ, nè sə tək nùmbu nè ghaŋ nè Nwìi nè sak bwìŋ nè.

<sup>7</sup> Wèŋ kək ja'a na lak Sodòm bə Gòmora, nè ye bə buk lak sè yà' à kʉəp fo' yà'a nè. Bùu sè fo' sə à sə gù bup, nè sə ko sàhà nsàp nè anə ye co ñwè kà vɛ'nə gù yuk, nè kà mbeŋ kòm lòk. Anə geŋ wo ye ñgə' sənə mis nè nà'a kà liìŋgè. Yè'sə à ye ñgòsè bwìŋ pwe' ntu' də wo yuk duk, nè kà nsàp ànə gù.

<sup>8</sup> Bùu sè wo a ni muŋgorə wèŋ yè'sə wèŋ, wo ka yàwo zok yeŋ. Wo tsərəgè bum sè yà' ka zeŋ yeŋ fana wo gù bup bə ni' awo, nè kà ñaaŋ Nwì co yumok jə, nè sə yak masinjàa Nwì wèŋ sè wo sè ghaŋ wùriŋ sə.

<sup>9</sup> A mègù-a sè ŋkum masinjà Nwì nè liŋ ye də Makè nà'a, ghà nè bə Satà à kùèm bə vè ni' Musì

nà'a fana yi à ka ze' nɔ̀ ncèp nè bɔ̀p cɛp fa. Yi à duk fa mègù nà' dɛ, <<Mù mè'rɛ wu wɛɲ Tà.>>

<sup>10</sup> Bohòbùu yè'sɛ yàwo, wo yàk bɛ bum sɛ wo ka bɛ zɛɲ rɛɛɲ mwè. Wo mègù co nàam ɲɔɲ, wo gù mègù bum sɛ yà' kok sɛ ntùu wo. Wo gu vɛ'nɔ̀ fana, wo sɛ jɔɲ naaɲ nzak mɛ tuhù wo nè nà'a nè lɛsɛ wo ntsɛ'mòk.

<sup>11</sup> Wo cu bɔ̀p. Wo sɛ yù kùu Ken nè yi à zɛ moma ye. Wo caɲ gbɛ sɛnɔ̀ bɔ̀p dɛ ya wo tse' mbàm fo', mvè'nɛ̀ Balàm ànɔ̀ gu yà'a. Wo nè kpɛ sɛ' bùusɛ wo a gu tu bohòNwì mvè'nɛ̀ Korà à gu tu, nè kpɛ yà'a.

<sup>12</sup> Ghà nè wɛɲ cugè ɲgòzɛ zuzɛ awɛɲ co bùu Jisòs wɛɲ fana bùu yè'sɛ wɛɲ sɛ jɔɲ vɛ fa wɛɲ marè'tu. Wo cu, nè sɛ no rùk mvwe' mò'fis, nè sɛ tsɛrɛ megu ni' awo, nè kà marè'tu tse'. Wo mègù co mbàk nè fɛfɛ kè bwì' samsɛ nà' ya nà'a kà mbùɲ ntòli. Wo co tɛ sɛ mvèk a kùrɛ co wo zɛm nto' laɲ fana wo kà zɛm. Wo co tɛ sɛ wo cok fis yà' co'o fana yà' kpɛ bɔ̀p.

<sup>13</sup> Wo mègù co ndzɛp nè fɛfɛ bwì'lɛ nà' fana bɔ̀p sɛ wo sɛ gùu sɛ ye co jep sɛ yà' duk na mɛ tu ndzɛp anɔ̀. Wo co ɲkèɲkàaɲ sɛ wo a jàm mè'rɛ bù'rɛə awo sɛ wo tɛəɲgè fo' sɛ. Nwì a fùhu nɔ̀ɲsɛ fa wo mvwe' ɲkəɲkɛs ndzɛm nè wo nè kè cu ca mvèsɛ laɲ.

<sup>14</sup> Enòk nè wu ta yè jə muni'i Adàm, yi ye tàcici nè sàmba nà'a, yi à cèp fa' sɛ' bɛ nsàp bù ènɔ̀. Yi à duk dɛ, << Wɛɲ ye, Tà sɛ vɛ bɛ masinjàa ye sɛ rɛrɛɲ vɛ'ɛ ncùhù nduk nè nduk.

<sup>15</sup> Yi sɛ vɛ ɲgòkè sak bwì pwe'. Yi nè gu nzak ko wes bùu sɛ wo à ka Nwì yuk bùu nsàap bɔ̀p

awo sè wo à sè gùu, nə ye bup sè wo à cèp yà' bə liŋ ye wèŋ.

<sup>16</sup> Bùu yè'sə wèeŋ ɲwəm kɛ'gè də bum sə kà bə, nə sə ce'e bum sè yà' ka bəboŋ yeŋ. Wo gù mègù bum sè ntəm awo sə dzəm. Wo ɲgàa kùm ɲgùŋ, nə sə cep la'rə boŋsə fa bwìŋ cù wà, ya ma nə ɲjàwo sə boŋ.>>

### *Jud Fa Krètèŋ Wèŋ Ntip*

<sup>17</sup> Bohòwèŋ yàwèŋ fana bwema am wèŋ, wèeŋ kà də wèeŋ swi bisə yusə ɲgàa ntum Tà àvès, Jisòs Krèst, à tsè' də yà'a nə kə ye ntsə'mòk yà'a duk.

<sup>18</sup> Wo à tsè' weŋ duk də, <<Ghà nə nzeŋgòŋ kuəp ɲgòmè nùu fana bwìŋ nə tesə və, nə sə ywi'lə weŋ. Bùu yè'sə wèŋ, wo kà Nwì yu'gè. Wo gù mègù bum sè ntəm awo sə dzəm.>>

<sup>19</sup> Yà'a wo sè wo jə vègè gègà'à mɯŋgorè bwìŋ. Wo yà'sə bùu nzeŋgòŋ wèŋ, wo ka Yòŋsə nə Nwì nə tse'.

<sup>20</sup> Bwema am wèŋ, bohòwèŋ yàwèŋ fana wèeŋ lap mandzè ɲgòtəəŋ mali gugɯŋ bə Ntirè nə Bəboŋ nə wèŋ à dzəm nà' nə; Nwì ànə niŋtsok fa weŋ nà' yi. Wèeŋ sə lɛŋ, wèŋ sə yu'rə bohòYòŋsə nə Rərəŋ mvè'nè yi sə tsè' weŋ mandzè nə ɲgòlɛŋ bohòNwì.

<sup>21</sup> Wèeŋ sə gi mali bə mandzè nə co Nwì sə dzəm mali weŋ fo'. Wèeŋ sə gu ve'nə, mvè'nè wèŋ sə tək Tà Jisòs Krèst də yi nə kə jə lo weŋ bə koksəmanziŋ ye, nə fa ves lù nə nà'a nə kà mè yuk nə.

<sup>22</sup> Wèeŋ tse' koksəmanziŋ bohòbùu sè wo sə mùu mali vəm bə ma nə Nwì nə.

23 Bùu mok wèŋ cu sè wèŋ tse' ngòcaŋsə gəsə fis wo co wèŋ sə fis wo sə mvwe' mis. Mook sè wèŋ nə koksə manziŋ bohòwo. Megu də wèŋ sə lək bup awo sè wo sə gùu sə. Wèŋ kà cəək awo sè wo a gù bupsə yà' bə bup awo yà'a bə bo awèŋ jwèŋ lok.

*Vesùwèŋ Kwasə Nwì*

24 Vesùwèŋ kwasə Nwì nə aco yi nonşə to weŋ, wèŋ kà gbù nə. Ghà nə yi nə nì ñàaŋ ye, nə sə sak bwìŋ, yi jəŋ və weŋ ngòkə təəŋ kù mantombii yi, wèŋ təəŋ jì nzak, nə kwa wùriŋ.

25 Vesùwèŋ kuksə Nwì nə yi mègù Nwì yi nə. A yi nə yi a fa vesùwèŋ lùŋ ndzə bohòTà àvès, Jisòs Krəst nə. Kəkuksəə ye bə liŋ ye, nə ye gaŋ ŋkum ye sè ghaŋ sə, ñàaŋ yee kà kè mè yuk. Bum yè'sə ye vɛ'nə mvə'nə yà' à yè jə, nə kə dzeŋ ntinə, nə ye mvèsə nə mvèsə. Yà'a ye vɛ'nə.

**Nwàk Nwì Ma Rùk Nè Fi**  
**New Testament in Yamba**

copyright © 2011 Wycliffe Bible Translators, Inc.

Language: (Yamba)

Contributor: Wycliffe Bible Translators, Inc.

All rights reserved.

2020-12-01

---

PDF generated using Haiola and XeLaTeX on 18 Apr 2025 from source  
files dated 29 Jan 2022  
c475d5b3-da44-51cf-93ca-f255b72fe481